

Gairm

a' tighinn a nise, tha na fir againn cho trang le comuinn Ghàidhealach 's le cuirmean ciùil 's nach eil ùine aca. Mar sin, tha eagal orm gum feum mi an spaid a lorg mi fhéin agus toiseach tòiseachaidh a dhèanamh air mo chuid phlanntaisean a chur.

A' bruidhinn air dìtheanan, am faca sibh na lusan beaga Frangach sin, air an tiormachadh 's air an cur air dòigh los gum mair iad ùine mhór. Agus iad a' coimhead cho coltach ri flùraichean air an ùr bhuaire. Gheibhear iad ann an dathan fìor bhòidheach—dearg, gorm, buidhe, is uaine. Tha iad mòran nas taitneach na a' mhór chuid de na flùraichean eile sin a nithear leis an làimh. Shaoilinn gun deanadh iad an gnothach glé mhath airson bòrd na Nollaige.

Ar leam cuideachd gu bheil suim de chraobhan na Nollaige a' sìor dhol am meud. Mar thà, tha a' chuid as motha de dh'uinneagan na sràide againne a' boillsgeadh le craobhan air an sgeadachadh gu brèagha le rudan deàrrsach, agus air an soillseachadh le iomadh dath. 'S mór an othail a nithear ris an Nollaig le beag is mór ach is e so làithean na cloinne bige. Bha Santa riamh air a mheas aig a' chloinn mar dhuine còir fialaidh, a bheireadh seachad gu saor do gach pàisde na tiodhlacan air am bu mheasaile e. Ar leam gur e rud duilich a th' ann mar a tha iad a' faotainn eòlais eile an diugh anns a' bhaile mhór. Fada roimh theachd na Nollaige, cluinnidh iad gum bheil Santa air tighinn do na bùthan shìos am baile; theid iad 'ga fhaicinn, ach feuch am bheil e a' liubhairt tiodhlacan gu saor dhaibh. Feumar bonn airgid a thoirt seachad air gach nì—airson rudan suarach aig a sin. Shaoilinn fhéin gun robh innleachdan gu leòir aig na bùthan, ged a dh'fhàgadh iad Santa bochd a' ruith sìos is suas an sìmealair mar a b' àbhaist dha. Ach chan eil suim do dh'aislingean cloinne an diugh, ma tha na h-aislingean sin a' seasamh eadar cuid agus sgillinn prothaid.

Bha mi 's an eaglais an latha roimhe ag éisdeachd ri Duitseach—duine iongantach. Albut Goodyaer an t-ainm a th' air, agus tha iad ag innse dhomh gun robh e 'na sgoileir Ceilteach iongantach ann an Oilthigh Utrecht. Thug iad dhà "Ollamh" airson pàipear a sgrìobh e mu Chath Chluain Tairbh, ach tha e nise ann an Colaisde na h-Eaglaise an Glaschu a' tighinn a mach airson na ministeirealachd. Tha e 'na bhraisiche duine, ach tha e a' stialladh air a' Ghàidhlig ionnsachadh—chan esan a mhàin ach a bhean 's a' chlan cuideachd. Tha iadsan a' fuireach ann an Ceann-Tìre, a' feitheamh gus am bi an t-Ollamh fhéin a mach. Chan eil a dhìth air an uair a bhios e ullamh ach coimhthional Gàidhealach, agus tha iad ag ràdha rium gum bheil sùil aige air àite ann am Muile. Tha feum air a sheòrsa, oir tha cus choimhthionalan bàn air a' Ghàidhealtachd an diugh.

Meal an naidheachd air ban Ìleach—Mairead Woodrow a Bodha-mór. Tha i air a dhol a mach do dh'Abaisinia gu bhith 'na bansgoilear do dh'oghaichean an Ìmpire Haile Selassie. Chan eil Mairead ach aon deug thar fhichead, agus bha i thuige so 'na ban-altrum ann an ospadal ann an Glaschu. Fhuair iad an t-àite dhith leis a' Mhorair Inverclyde a bha a muigh ann an Abaisinia bho chionn greise.